



Naalackersuisut siulittaasuata ammaanersiornermi oqalugiaataa tungavigalugu ammaanersiornermi oqalugiaat.

(Naalackersuisut siulittaasuut)

Inatsisartut ukiuat aallartikkaangat ulloq nalliuttorsiorfiujuaannarpoq. Nunami tamat oqartussaaqataaffigisaanni oqartussaaqatigiinnikkullu pitsaasunik naleqartitaqarfigisatsinni najugaqarnitsinnik tamanna eqqaasitsisarpoq. Tamatta oqaaseqarsinnaatitaallutalu isummatsinnik saqqummiussinnaatitaavugut. Nalitsinni kikkut tamarmik isummersupallassinnaaffianni inuillu attaveqatigiittarfiisigut nunatsinni kikkunnut tamanut siammarterisinnaaffigisaanni tamanna eqqaamassallugu pingaaruteqarpoq. Nukittoqqutigaarput, aammali unammillernartortaqqarpoq.

Tassungalu atatillugu pingaaruteqarpoq isummersorsinnaatitaaneq isummersortussaataanerlu immikkoortissinnaassallugit. Allatut oqaatigalugu, isummersorsinnaatitaavugut, tamatigulli taamaaliortariaqanngilagut. Nunatsinnimi innuttaasut inoqatiminnut sakkortuupilussuarmik pissusilersortut akuttunngitsumik takusarpakka, assersuutigalugu Facebookikkut. Oqaatsit sakkortuumik eqquisinnaanerat eqqaamassallugu pikkoriffigineruseriaqarparput. Oqaatsit annernarsinnaanerat. Minnerunngitsumik kikkut tamarmik malinnaaffigisinnaasaanni saqqummiunneqaraangata. Ataqeqatigiilluta isumassuillutalu immitsinnut pissuseqarnissarput pinngitsoorata pikkorinneruffigisaqarparput. Tamannalu Inatsisartut ukiuannut aggersumut kissaatigisama ilagaat.

Angut inuit attaveqatigiittarfiini inunnut allanut pissusilunnissaminut tunuarsimaanngitsoq tassaavoq amerikamiut præsidentiat Donald Trump, nunatsinnik aasaq ajunngitsutigut ajortutigullu annertuumik sammisaqartitsisoq. Itisiliiffiginngikkaluarlugu oqaatigiinnassavara nunarput TUNINIAGAANNGIMMAT.

Uagut, inuiaat kalaallit, TUNINIAGAANNGILAGUT.

Uagut nunattalu niuerutigineqarsinnaasutut isigineqarnerput ataqqinninnerunngilluinnarpoq. Tamatuma Trumpimit USA-miillu paasineqarsimanissaa neriuutiginarpoq, taamaanngippat paasineqarnissaata tungaanut erseqqissaatigeqqittuartariaqassavarput.

Trumpilli pissusilersornera nunarsuaq tamakkerlugu politikkimut pissaaneqarniullunilu politikkimut tunngatillugu, nunatta nunarsuarmi pissaanilissuarnit soqutigineqalersimaneranik allannngortitsinngilaq. Soqutigininnerlu taanna uagut iluaqutiginiarlugu atorluartariaqarparput. Taamatulli inissisimanitta atorluarniarnissaa ingasaannaveersaartariaqarparput. Nunami pissaanilissuaq sakkutooqarnikkut pissaaneq atorlugu qanoq iliuseqassagualarput uagut Danmarkiluunniit annertunerusumik iliuseqarsinnaassanngilagut. Tamanna qularigaanni, Ruslandip Krimmimik tiguaanera



qiviaannarneqarsinnaavoq.

Taamaammat periarfissarissaqaraluarluta aamma eqqarsarluarluta atorluartariaqassavagut. Nunat pissaanilissuit akornanni iluarisatsinnik toqqaasinnaalluta inissisimangilagut. USA-p nunarput nunavittami ilaatut isigaa, aamma Ruslandip Kinallu nunatsinni annerusumik oqaasissaqartitaalernissaat akueringgisaannassavaa. Tamannalu eqqumaffigisariaqarparput. Imaassanngilarli qanoq ilioqqusisut naalaannassagigut. Paarlattuanilli piumasaqaateqassaagut, qanorlu naleqartiginerput ilisimaaralugu. Piumasaqaatigulli piviusorsioortuussapput eqqarsaatigilluagaallutillu.

Amerikap periarfissaalernera

Aningaasaqarnerput tatisimaneqarpoq. Atugarissaarnerup maanna qaffasissuserisaa attatiinnassagutsigu, taava Danmarkimit ataatsimoortumik tapiissutaasartut pinngitsoorsinnaanngilagut. Maani ataatsimiittarfimmiittugut tamarluinnangajatta isumaqatigiissutigiissutigaaarpud taama pinngitsoorsinnaanngisaqarnerput qimattariaqarippud, aamma Danmarkimit ataatsimoortumik tapiissutaasartut isumalluutigiunnaarnissaannut aqutissat ersarilluutut ukiorpasuarini oqaluuserisarpagut.

Ilinniarsimassutsip qaffarsarneratigut, isumaginninnikkut ajornartorsiutit millisarnerisigut namminersorlunilu inuussutissarsiuteqarnerup iluani siuarsaanikkut tamanna pisinnaavoq. Trumpilli USA-llu soqutiginninnerisa ersarilluinnartup maligitsigisaanik – aamma allamik - periarfissaqalerpugut. USA-p qaninnerusumik suleqatiginissaanut periarfissaq. Periarfissaavoq malersortariaqarparput. Imaanngitsoq Danmark danskillu ataatsimoortumik tapiissutaat sussaaginnassagigut, aamma ilinniartitaanermut, isumaginninnikkut ajornartorsiutinut aningaasaqarnikkullu siuarsaanissamut tunngatillugu anguniagarput annikillissanngilarput.

Naagga – Amerikap periarfissaalernera malersortariaqarparput, aningaasaqarnitta pitsanngorsarnissaanut, siammasinnerulersinnissaanut qajannaannerulersinnissaanullu periarfissat allamik ilaneqarmata. Taamaattoqassappalli oqallisiginissaanut amerikamiullu oqaloqatiginissaannut qununnginnissarput pisariaqarpoq, asuli amerikamiut Trumpilu itigartiinnarnagut inuttaalu silaqannginnerarlugulu allanik taagorlugu.

Periarfissarmi atorluartariaqarparput misissuillutalu isumaqatigiinniarnarit aallartisarlugit. Amerikamiununa suna perusukkaat uagullu sumik tunerusussinnaassavagut?

Oqaloqatiginngikkutsigimmi paasisaqarnaviannngilagut. Taamaammat eqeersimaartariaqarparput periarfissallu takkuttut atorluarlutigit.

Taamaammat Demokraatinit Naalakkersuisut kaammattussavagut Danmarkip kinguneqartussamik suleqatigineratigut USA-mut qanittumik attaveqaqqullugit, USA-llu isumaqatigiissuteqarfiginissaa qulakkeeqqullugu, amerikamiut soqutiginninnerat aningaasaqarnikkut inissisimanitta pitsanngorsarnissaanut inuusuttortattalu pikkorissut Amerikami ilinniartarfeqarfissuit ataqqisaasut ilaanni



immikkut inissaqartinnissaannut allatigulluunniit iluaqutaaqqullugu.

Pingaarnertullu aamma taarusupparput Qallunaat Nunaata paasisariaqaraa tamatingorluinnaq Kalaallit Nunaat, issittorlu pineqartillugu minnerunngittumillu isumaqatinginninniartoqartillugu nerrivimmi issiaqataallutalu isumaqatinginniniaqataajuaannarnissarput, uangummiuna nunarput.

Trumpilli USA-llu eqqartornerat tassunga killikkallarli.

Mittarfiit nutaat tikilluaqutigit

Sammasamut allamut ukiumi kingullermi aamma sammineqangaatsiartumut saakkusuppunga; Mittarfinnik sanaartortitsineq. Mittarfinnik sanaartortitsinerup Demokraatinit aningaasaliinertut isigineqarnera isertugaataangilaq. Aningaasaliineq uagut nunaqavissut amerlanersaannut angallannikkut pitsaanagerusunik akikinnerusunillu periarfissaqartitsilertussaq. Tamatuma saniatigut mittarfinnik sanaartortitsineq nunatsinni inuussutissarsiortunut aamma iluaqutaasussaavoq, aamma mittarfinnik sanaartortitsinerup takornariaqarnikkut pitsaanagerusunik periarfissaqartitsinissaa qularutissaangilaq. Allatut oqaatigalugu, mittarfinnik sanaartortitsineq nunaqavissunut avataaneersunullu annertuumik iluaqutissartaqarpoq.

Mittarfinnik sanaartortitsinissap qulakkeernissaa Demokraatit ukiarmi qinerseqqittoqarnissaa pinngitsoortinniarlugu Naalakkersuisunut partiit tapersersuisuunissatsinnik toqqaanitsinnut pissutaalluinnartut ilagivaat. Taamaammat Nuummi Ilulissanilu atlantiku ikaarlugu miffigineqarsinnaasunik mittarfiliornissamut qulakkeerinniffiusumik isumaqatigiisummik atsioqatigiittoqarnera nuannaarutigilluinnarparput. Aamma suliap ingerlaqqinnissaa qilanaarivarput, Kujataani illoqarfiit anginersaanni nunap immikkoortuani mittarfiliornissaq pillugu Qaqortormiunut nuannaarutaasussamik isumaqatigiisummik atsioqatigiissuteqartoqarnissaa qulakkeerniarneqartussaassammat.

Suliarli ajoraluartumik imaannaasimanngilaq. Maanimi Inatsisartuni partiit pingasut - Inuit Ataqtigii, Partii Naleraq Suleqatigiissitsisullu – mittarfinnik sanaartortitsinissaq ajoraluartumik akerlilersungaatsiarpaat. Oqaatsinut kusanartunut poortuisoqarpoq, oqarluni aningaasaqarneq ernumagaarput, Kangerlussuaq ernumagaarput, Narsarsuaq ernumagaarput, avatangiisit ernumagaagut ilaallu ilanngullugit.

Unneqqariinnartali; piviusormi tassaavoq partiit taasakka pingasut aalajangiinissartik qunugimmassuk. Partiit taasakka pingasut ersiornerik sapiissusermut ajugaatippaat. Tusaalaariarsiulli; sapiissuseqartariaqarpugut – aalajangiisariaqarpugut. Pisarnerput malillugu ingerlaannarsinnaangilagut. Pitsaanagerusumut saatsitsiumalluta allannguisariaqarpugut.

Uanga Demokraatillu mittarfinnik sanaartortitsinissaq tulluusimaarutigaarput. Nunap ineriartortinnissaanut akisussaaffimmik tiguserput tulluusimaarutigaarput. Nunarput Inuit Ataqtigiinnit, Partii Naleqqamit Suleqatigiissitsisuniillu aqunneqaraluarpat tikkuinnarluta nunarsuarmioqatitsinnut ingerlarsortunut isiginnaartuunnassagaluarpugut. Demokraatit tamanna kissaatiginngilaat, taamaammat partiit taasakka pingasut sakkortuumik kaammattorusuppugut nutaanut akerliuiniarnerminnik ajoqutaasinnaasumillu pissusilersornerminnik unitsitseqqullugit. Uninngaannaraluaruttaluunniit nunarsuaq kaavittuassaaq,



kaaveqataaniarta ineriartornerlu peqataaffigalugu.

Eqqortunik aalajangiinissamut sapiissuseqarnissaq ataatsimut isigalugu eqqumaffiginerusariaqarparput, aamma aalajangiinerit nunatsinnut inuiaqatitsinnullu pitsaasumik kinguneqartussat eqqarsaatigalugit.

Suliffeqarfiutivut nukittorsartigit

Sivisuallaartumik sumiginnarsimasatta ilaat tassaavoq inuussutissarsiutinik ingerlaqartut pitsaanerusunik sinaakktissaqartinnissaat. Ilami innuttaasoqarpugut pitsassuarnik isumassarsiaateqartunik.

Aatsitassarsiutileqatigiiffiit piiannikkut suliffissuaqarnermik aallartitserusupput. Aalisakkanik suliffissuaqarneq ingerlalluartoq pigaarput. Taamaakkaluartoq allaanngilaq pakkersimaalaartugut.

Allaanngilaq tassunga atatillugu aamma aalajangiinissarput qunugigipput. Assersuutigalugu Kujataani paaaviliornissamut paaanissamut akuersissummik tunniussinissaq allaffissornikkut sooq taama ajornartorsiutaatigissava? Arriippallaarujussuarpoq.

Sooq pitsaasumik isumassarsiaqaraanni nammineq suliffeqarfimmik aallartitsinissaq taama ajornakusoortigiva?

Peqatigiilluta inuussutissarsiutinik ingerlataqartunut sinaakktissanik pitsaanerpaanik pilersitsinissaq isumaqatigiissutiginiartigu – pioreersunut pisusanullu. Allaffissornerup iluani torersaassiniarta aalajangiillutalu, inuit sulilluartut aningaasarsiorsinnaalersillugit suliffinnillu pilersitsisinnaanngortillugit tamatsinnut nuannaarutaasumik.

Tamatumunnga peqatigitillugu suliffeqarfiutitta nunatsinni sulisussarsisinnaanngikkaangamik avataanit sulisussarsisinnaanissaat ajornannginnerulersitsigu. Sulisussaaleqineq pissutigalugu tunisassiorneq arriippallaaleraangat immaqaluunniit unitsivissortariaqaleraangat tamatta aningaasatigut annaasaqartarpugut. Aamma – sooq aamma suliffeqarfik allamiumik sulisoqarnissaq nunaqavissumik sulisoqarnermit piumanerussavaa? Nunanit allanit sulisussanik tikisitsinissaq, taakkulu inissaqartinnissaat allallu akisuujupput? Sooruna suliffeqarfiit nunaqavissut pinnagit allamiunik sulisoqarusunnerunerannik isumaliortoqartalersoq. Taamaattoqanngilluinnarpoq.

Kiisalu aamma suliffeqarfiit aningaasaatimik amerlanersaannik pigisaqaannarnissaat isumaqatigiissutiginiartigu. Nalunngilara socialistit isumaliortaasiannut tamanna uniuuttoq, isumaqartoqarluni suliffeqarfiutillit tamarmik aningaasaatilissuusut ajortunik siunertallit, tamatsinnit atornerluillutik aningaasanik kaasarfimminnut asuli ikioraasartut. Ukiorsiaa? Uanga taamaassorinngilara. Uangami killormorluinnarmik paasisarpakka.

Suliffeqarfiutillit takusarpakka inuiaqatigiinnut tamanut akisussaaqataasut, aasersuutigalugu CSR-imut peqataanermikkut. Suliffeqarfiutillit takusarpakka suliffeqarfimminnut aningaasaliisut, allisartinniarlugit, aningaasatigut siuariartortitsiniarlutik suliffeqarfinnillu pilersitsillutik. Aamma qularutiginnngilluinnarpara suliffeqarfiit aningaasaatit amerlanerusut piginnarsinnaagunikkut, aningaasat taakku suliffeqarfinnik suli pitsaanerusunik sulilluarnerusunillu pilersitsinissamut atussagaat inuiaqatigiinnut tamanut



nuannaarutaasumik. Taamaammat ingerlatseqatigiiffinnut akileraarutip appartinnissaa sukkanerpaamik isumaqatigiissutigisariaqarparput. Aamma saniatigut pitsaalluinnartumik iluaqutissartarissavaa nunarput suliffeqarfinnut nunanit allaneersunut aningaasaliisartunullu nunanit allaneersunut pilerinarnerulissammat, tamannalumi pisariaqartilluinnarparput. Kisianni tassa aamma sapiissuseqarnissarput aalajangiinissamullu qununginnissarput pisariaqarpoq.

Kikkut tamarmik tunniuseqataassapput

Demokraatit aamma isumaqarput piumasaqartarnermik eqqarsartaaseqarnerup, nunaqqatitta ilamininguinit ajoraluartumik pigineqartup, pimoorullugu iliuuseqarfiginissaanut piffissanngortoq. Inuiaqatigiinni inuit sulisinnaasut, sulinissartilli eqiagalugu sulerusunngitsut, sakkortunerusumik pissuseqarfisariaqarpagut. Nunaqqatittami ilaat pisortanit ikiorsiissutinik pisartagaqaannarlutik angerlarsimaannartarneranni suliffeqarfiutitta ilinniarsimanngitsunik nunanit allanit tikisitsisariaqartarnerat imminnut assortuuttupilussuupput. Tamanna naapertuutinngilluinnarpoq. Aamma erseqqissaatigilaarlara, inuit sulisinnaanngitsut arlaatigulluunniit uparuartunnginnakkit.

Nunaqqatitta ilaasa napparsimanertik assigisaanilluunniit pissuteqartumik sulisinnaannginnerat Demokraatini akueralugulu ataqqivarput. Inuit taakku ikiugassarivagut sapinngisatsinnillu tapersersugassaralutigut.

Tamatunngali peqatigitillugu nassuerutigisariaqarparput maanna suliffissaaleqisut akornanni inoqarmat sulisinnaassuseqartunik, sulerusunngitsunilli. Demokraatini tamanna naammaginantinnngilarput. Isumaqarpugummi inuiaqatigiit ingerlanneqarnerannut tunniuseqataanissaq innuttaasutut pisussaaffigineqartoq, pisinnaarsuugaanni.

Aaqqissuussaanerput allannngortittariaqarparput sulineq tamatigut imminut akilersinnaanngortillugu, aamma inuit sulerusunngitsut qanoq iliorfigineqarsinnaanerat qimerloortariaqarparput.

Demokraatini isumaqarpugut tamatumunnga atatillugu sakkortunerujussuusariaqarlutalu kinguneqartitsisariaqartugut. Immaqa aaqqiissutaasinnaasoq ima ajornanngitsigigaluarpoq kinaluunniit pisortanit ikiorsiissutinik pisartagaqartoq inuiaqatigiinnut taarsiutitut tunniussaqaqartalerpat. Tamanna ilaatigut Majoriaq suleqatigalugu ingerlataqarnikkut pisinnaavoq imaluunniit assersuutigalugu illoqarfimmi nunaqarfimmiluunniit najugaqarfigisami eqqakkanik katersinikkut assigusutigulluunniit. Siunertaa tassaavoq innuttaasut sulisinnaassuseqartut arlaannaalluunniit asuli angerlarsimaannarlutik pisortanit ikiorsiissutinik isumalluuteqaannannginnissaat. Kikkut tamarmik tunniussaqaqartariaqarput.

Eqqaamaneqassaarlu kisitsisit pissarsiarineqarsinnaasut kingullit ersersimmassuk innuttaasoq ataaseq pisortanit ikiorsiissutinik pisartagaqarunnaarluni sulileraangat inuiaqatigiit 14.000 koruunit 20.000 koruunillu akornanni sipaaruteqartarmata.

Tassungalu atatillugu llanngaassivik pillugu inatsisissatut siunnersuutip ataatsimiinnermi matumani oqaluuserineqartussaamera naammagisimaarpara. Demokraatini isumaqarpugut innuttaasut pisortanut akiitsuusa appartinnissaannut alloriarnerussasoq pisariaqarluinnartoq. Aammattaaq nuannaarutigaarput llanngaassiviup innuttaasunut tamanut atuutissannginneranik, innuttaasunullu pisortanut akiitsulinnut



taamaallaat atuuttariaqarneranik Demokraatit piumasaqaatigisaat Naalakkersuisunit tusaaniarneqarsimammat. Uatsinnummi nalequttuuvoq innuttaasut akiligassaminnik akilersuisinnaassuseqartut aqqissuussinermut Ilanngaassivittut ittumut pinngitsaalillugit ilanngutsinneqannginnissaat. Innuttaasulli akiitsoqanngitsut piumagunik aqqissuussinermut kajumissutsiminnik ilanngussinnaanerit ajorinngilarput.

Maannamut eqqartukkama nunatsinni siuariartormik pilersitsisinaanissaat qularinngilluinnarpara, aammami pisariaqartilluinnarparput, aningaasanik atuiffigineqarsinnaasut amerlaqimmata.

Innuttaasut atugarissaarnerat aningaasaliiffigissavarput

Meeqqat atuariannut ilinniartitaanikkullu aqqissuussinerup sinneranut annertuumik aningaasaliineq ingerlatiinnassavarput. Kinguaariinnut aggersunut ilinniartitaanikkut pitsaanerpaanik sinaakkusersuiuarnissarput pingaaruteqarlunnaarpoq, anguniagarpullu sulit angoqqajannngilarput. Ilungersuullugu ingerlaavartumillu sulit sulissutigineqartariaqarpoq.

Isumaginninnikkut ajornartorsiutit aqqiivigineqarnissaannut aningaasat amerlanerusut atortariaqarpugut. DR-ip Tasiilamit aallakaatitassiaa ajortorsiutitsitta oqimaatsut ilarpasuunik sammisaqarfiuvoq, nuannaarutigaaarlugu Danmarkimut ikioqqunissatsinnut nunatut sapiissuseqarsimagatta. Kukunerussaarmi isumaqaraanni suut tamaasa nammineerluni aqqiissuteqarfiginissaannut nukissaqarluni. Tamatta inuttut ikiorneqarnissatsinnik pisariaqartitsisinaanarpugut, taamatullu aamma nunatut.

Demokraatini isumaqarpugut ikiorneqarnissamik noqqaassuteqarnissamut sapiissuseqarnek nukissaqarnermik takutitsisoq. Ikiorneqarnissamik noqqaassuteqannginneq pingaarniarnermut paatsuukkamut ersiutaannavoq. Kisianni soorunami isumaginninnerup iluani ajornartorsiutitta aqqiissuteqarfiginissaannut Danmarkip allalluunniit siuttuusinnaannginnerat nalunangilaq. Uagut tamanna akisussaaffigisariaqarparput, nassuerutigilluinnartariaqarparpullu sukkasuunik ajornanngitsunillu aqqiissutissaqanngimmat. Ilungersorluni piffissaq ungasinnerusoq eqqarsaatigalugu sulinissaq pisariaqarpoq. Demokraatinili isumaqarpugut aningaasat amerlanerpaartaat sumiiffinni ajornartorsiorfiusuni suliniutinut aqqissuussinernullu atorneqartariaqartut. Ajoraluartumillu allaffissornerup annertuseqqinnerata pitsanngorsaataasinnaaneranik isumaqartoqartarpoq. Matumani assersuutigalugu eqqarsaatigaara isumaginninnermut aqutsisoqarfimmik pilersitsineq. Oqanngilanga ajortuusooq, aningaasalli atornissaannut isumatusaarnerpaajusorinngilara. Sooq aningaasat isumaginninnikkut ikiortariaqartunut atugassat pisortat allaffissornerannut angivallaareersumut atorneqassappat? Naagga – aningaasat inuiaqatigiinnut ingerlateqqittariaqarpugut iluaqutaanerpaaffissaannilu sulitillutigit.

Isumaginninnerup tungaatigut ajornartorsiuteqarnitta ilaqutariit nukittorsarnissaannut pitsaanerpaanik sinaakkusersuisariaqarnerput uannut uppersararteqqippaa. Ilaqutariimmi tassaammata meeqqanut ulluinnarni katersuuffiusussat, taamaammata ilaqutariit ingerlalluarnissaat aamma pingaaruteqarpoq. Ilaquttagut qaninnerpaasagut inuunermi artorsaateqarnitsinni nukissamik aallerfissaraagut. Ilaquttagut



ulluinnarni asanninnermik, tapersorneqarnermik isumassorneqarnermillu aallerfissaraagut. Aamma ilaqutariit tassaapput meerartatta isumassuinermik aammalu imminnut allanullu akisussaaffimmik tigusinissamik ilinniarfissaat. Ilaqutariit allatut oqaatigalugu inunnik nukittuunik nunatta siunissami toqqammavigisassaani pilersitsinissamut pingaaruteqarluinnarput. Ilaqutariit ataatsimoorfiit pigisatta nukittunersaraat qaninnerpaaffigisaralutigillu.

Taamaamat ilaqutariit ataatsimoorfissatut toqqissimaffissatullu illersorneqarnissaat pingaaruteqarluinnarpoq. Ilaqutariit nalinginnaasuuneri, ilaqutariit qatanngutisiariffiuneri, iluaqutariit suaiaqatigiittunik angajoqqaarfiusut, ilaqutariit avissaarsimasut allatorluinnarluunniit ilaqaariittoqarnera tamatumani apeqqutaanngilaq. Ilaqutariit kikkulluunniit ilaqutariit ataasiakkaat ilaqutariittut ingerlaannarnissartik qulakkeerniarlugu siunnersorneqarnissaminnut ikiorneqarnissaminnullu pitsaanagerusumik saaffissaqartariaqarput. Ilaqutariit siunnersorneqartarnissaannut tunngasumik nammineq isummassarsiaqarpunga ataatsimiinnitsinni kingusinnerusukkut oqallisigisassatsinnik, isumassarsialli allat aamma ammaffigilluinnarpakka. Demokraatini aamma isumaqarpugut meeqqanik sumiginnaasarnerup piffissami ungasinnerusumi annikillisarneqarnissaanut annertuumik suliaqarnissatta pitsaasumik aallartisarnissaa pingaaruteqarluinnartoq.

Susassaqarfiit aningaasaliiffigisariaqakkatut isumaqarfigisama pingajuat tassaavoq peqqinnissaqarfik. Tassani annertuupilussuarmik ajornartorsiuteqarpugut. Inuit amerlavaartut pisariaqartitaminnik katsorsartinnissartik pinngitsoortarpaat, tamannalu iluarsineqartariaqarpoq. Tamatta nappaammit eqqugaasinnaavugut, tassangaannartumillu pisinnaalluni. Taamaamat pingaaruteqarpoq peqqinnissaqarfeqarnissarput uagut qanigisagullu eqqugaatilluta isumaginnissinnaasumik.

Peqqinnissaqarfiup ingerlalluurtup tamatta toqqissimasumik saaffissaqarnissarput qulakkeertussaavaa, pisariaqartitatsinnillu isumagineqarluta katsorsarneqarluta. Taamaamat nakorsat peqqissaasullu napparsimasunut attaveqarnertik pingaarnersiunerimi salliutittariaqarpaat allaffissornikkullu suliasatik tunulluinnerullugit. Oqimaaqatigiissikkuminaappoq, Peqqinnissaqarfimmulli aningaasaleeqqeqattaaginnarnissarput iluaqutaanaviangilaq. Aningaasat eqqortumik aamma atorneqarnissaat ukkatarinerusariaqarluinnarparput.

Innuttaasutut inunngornermit toqkukut qimagunnissap tungaanut pitsaasunik tamakkiisunillu neqeroorfigineqartarnissarput qulakkeertariaqarparput. Napparsimalernej naggataatigullu toqkukut qimagunneq tamatta inuunitsinni aqquasaagassarivagut. Taamaamat taamatut ilungersunartorsiortoqarnera peqqinnissakkut pitsaanerpaamik sullinneqarnissatsinnut piareersimasoqarnissaa qulakkeertariaqarparput. Ullumikkut ajoraluartumik taamaangilaq, peruluttummi nalaffissaat annertuumik amigaatigivagut. Tamatumalu ajoraluartumik kinguneraa qanigisaasut napparsimasortamik napparsimmavimmiinnerannik nuanninngitsumik ataqqinninngitsumillu misigisaqartarnerat. Tamanna pitsaanerulersittariaqarparput.

Demokraatini tamanna tunngavigalugu isumaqarpugut peqqinnissaq pillugu ataatsimiititaliarsuarmik pilersitsinissamut aningaasanut inatsisissaq pillugu ukiaq manna isumaqatigiinniarnernut atatillugu aningaasassarsiortariaqartugut, ataatsimiititaliarsuarlu Peqqinnissaqarfitta pitsaanerulernissaanut



isumassuinermillu katsorsaanermillu ukkatarinniffiulernissaanut kaammattuuteqassaaq. Ataatsimiititaliarsuaq suliaqarfiit sorliit iluaqutissartalimmik pingaarnersiorneqarnissaannut suliaqarfinilu sorlarni iluaqutissartalimmik atuisut akiliuteqartarnerannik eqqussinissamut kaammattuuteqassapput. Assersuutigalugu Danmarkimi nakorsaatinut kigutinillu isumaginninnermut atuisutut tamakkinngikkaluarlugu akiliuteqartoqartarpoq.

2018-imi upernaakkut qineqqusaarnermi Demokraatinit erseqqilluinnartumik nalunaarutigaarput peqqinnissaq pillugu ataatsimiititaliarsuaq pisariaqartinneqartoq. Pisariaqartitsinerlu annikillisisimangilaq, taamaammat ukiaq manna aallartisalereerniartigu kaammattuutinik sukkanerpaamik pissarsisinnaaniassaagut tamatsinnut iluaqutaasumik piviusunngortissinnaasatsinnik.

Peqqinnissaq pillugu ataatsimiititaliarsualiornissaq isumatusaarnertut isigaarput, taamaaliornikkut suliaasaqarfimmi ukiut tamaasa aningaasarpassuarnik naleqartumi aningaasaliinerit pingaarnersiunerillu sorliit pisariaqartinneqarnerisut paasilluarsinnaaniassavagut.

Tassalu Demokraatit oqallinnermi uani oqaaseqaatigigallagaat. Ataatsimiittarfimmit apeqqutigineqartut akissuteqarfiginissaat qilanaarivara pitsaatsumillu kinguneqartussamillu oqallittoqarnissarput neriuutigalugu.